



JULIO PEREIRA

DATA MORIS: 15 Setembru 1983
Irmaun SDB (Salesianu Dom Bosco nian)
DATA MATE: 4 Jullu 2007

LABARIK

Bainhira sei ki'ik nia passa nia moris nu'udar labarik iha knua. Hafoin hotu tiha nia estudu iha Eskola Primaria, nia tama ba Pré-Aspirantadu "Beatu Filipe Rinaldi" iha Venilale. Nu'udar pre-aspirante, nia moris nu'udar labarik simples no obediente, hodi hala'o nia kna'ar loron-loron nian ho di'ak. Nia gosta joga ho nia maluk sira, liuliu tebe-bola.

ADOLEXENTE

Hotu tiha nia estudu iha Pré-Aspirantadu Venilale, nia kontinua nia estudu iha Aspirantadu Fatumaka, iha tinan 2001. Iha ne'e mós nia hatudu nafatin nia hahalok simples no ksolok na'in nian. Espíritu ksolok no optimizmu nian ne'ebé nia experimenta iha amu salesianu sira, halo nia decide atu tuir dalan vokasaun nian iha Kongregasaun Dom Bosco nian. Nia tama ba novisiadu iha tinan 2004. Haree ba nia motivaun sira no nia hakarak ne'ebé boot tebes atu sai Salesianu, ikus mai nia halo duni nia Primeira Profissaun nu'udar relijiozu salesianu iha Fatumaka iha fulan Juñu 2005: nia hili atu sai Coadjutór (irmaun) iha Kongregasaun.

NU'UDAR SALESIANU

Durante nia moris nu'udar irmaun, nia nakonu ho espíritu salesianu ne'ebé fó hanoin ba ninia futuru: estudu no laran manas ba orasaun, ksolok no optimizmu, ativu iha desporto no múzika, besik ba foin-sa'e sira no ba nia maluk salesianu sira. Nia sai modelu ba salesianu foin-sa'e sira tuir Kristu nia ain fatin iha Dom Bosco nia karizma. Nia hahú estuda iha Universidade Katolika ba Formasaun Profesór sira nian (Universidade Marista sira nian) iha Baucau. Iha tinan eskolár 2005-2006, depois de halimar tebe-bola ho nia maluk sira, nia hahú sente moras maka'as ba nia ain, maski nia la halo eskorsu ruma. Foufoun nia ladún fó importánsia ba nia moras, hodi buka tratamentu "tradisional", maibé, bainhira ba ospital doutor dehan kedas katak nia moras todan: kankru ruin nian.

TEMPU MORAS NIAN

Neineik nia moras sai maka'as no doutor decide kedas atu tesi nia ain sorin tanba hahú atu deforma no sai moras tebes. Operasaun hetan rezultadu di'ak no ir. Julio hahú sente di'ak ba tempu badak. Hafoin, doutor sira deskobre katak kankru hadaet ona ba nia isin tomak. Nune'e, iha fulan Setembru to'o Desembru 2006 nia ba Jakarta hodi kontinua konsulta ho doutor sira ne'ebé konfirma diagnosi ne'ebé doutor iha Baucau hato'o ona. Sira aumenta hodi dehan katak, tanba kankru hadaet on aba orgaun sira seluk, operasaun ruma sei lori rezultadu ne'ebé negativu.

Ir. Julio fila fali ba Timor no ba hela iha Baucau ho serteza katak nia sei mate. Dr. Philips dehan ba nia ho klaru: "If you cannot add days to your life, add life to your days" (se ó la bele aumenta loron ba ó-nia moris, aumenta moris ba ó-nia loron).

Maski nia isin hahú atu trasforma an, maibé nia espíritu la muda, nia kontinua sai forte, fiel, nakonu ho domin no esperansa.

Iha ospital, maski nia moras todan, nia kontinua reza ba intensaun foin-sa'e sira nian iha mundu rai-klaran, liuliu iha Timor; nia reza ba comunidade salesiana, ba nia família no intensaun sira seluk tan.

Nia harohan hodi entrega nia moris ba Maromak.

Durante nia moras tomak, nia inan, ne'ebé hadomi tebes nia, kontinua akompañia nia no hela iha nia sorin; maluk salesianu sira comunidade Baucau nian tau matan no akompañia nia nafatin to'o loron ikus.

Ir. Julio, SDB, fila ikas ba Aman Maromak nia sorin kuana iha Baucau, iha loron 4 Julu 2007 ho tinan 24.

**Padre salesianu no
kolega sira nia sasin**



“Bainhira ha’u ba vizita ir. Julio iha ospital, ha’u konvida nia atu harohan ba intensaun ruma, no maski nia liman no isin tomak bubu, nia reza ho devosaun ba intensaun sira ne’ebé ha’u husu ba nia”.

Nia hakerek ho nia liman rasik iha momentu difisil, orasaun salesiana: “Jezús, Maria no José, iha Ita liman ha’u saran ha’u klamar...(Pe. Andres Calleja, ex Provincial SDB)



“Nia moris nakonu ho ksolok, nia kalmu no serenu tebes hodi aseita Maromak nia hakaran. Bele dehan katak ir. Julio nia vida tomak, nia moris ho nakonu. Ho fiar ne’ebé maka’as no espíritu ne’ebé lakan tebes, ir. Julio hatudu nia konfiansa iha Aman Maromak, iha ita Na’i Jezús no nia Inan Virjen Auxiliadora” (Maluk sira ne’ebé estuda hamutuk iha Universidade).


Ir. Julio nia lia-menon

Ha’u la iha tan dúvida ruma kona-ba ha’u-nia futuru. Agora duni ha’u hatene loloos kedas katak MATE mak ha’u-nia futuru.

✍ Se ha’u la mate,
ha’u se la koñese ó: Moris.
Se ha’u hela de’it iha mundu ida ne’e,
ha’u sei la sente ó: Ksolok.
Se ha’u la mate,
ha’u sei la MORIS fali.
Se ha’u hela de’it iha mundu ida ne’e,
ha’u sei hela ho ha’u-nia problema sira
no ha’u-nia dezafiu sira ho terus.
Tan ne’e, husik ha’u mate,
Atu nune’e ha’u bele hahú MORIS.

✍ Ba ema hotu-hotu nia orasaun no sakrifisiu, liuliu ba ha’u-nia família, ba kongregasaun ne’ebé simu ha’u nu’udar membru ida hodi moris nu’udar maun alin.
Dala ida tan, ba imi-nia sakrifisiu ha’u hato’o obrigadu.

22 Juñu 2007
Ir. Júlio, SDB



ATU HATENE IR. JULIO DI’AK LIU TAN

➔ Padre no irmaun barak hatene didi’ak ir. Julio, balun estuda hamutuk ho nia ka prepara an ba Profissaun hamutuk ho nia: bele “intervista” sira ka husu atu haktuir akontesimentu ruma ne’ebé halo sira apresia liután ir. Julio nia virtude salesiana sira, liuliu nia kapasidade atu haksolok maski iha susar laran.